

KANTIK da S. E N E O U R

Diskan - Sant Eneour, hor sant patron,  
Dalc'hit ar feiz start 'n hor c'halon;  
Selaouit ouz hor pedennou  
Ha skuilhit warnomp ho krasou.

- I. E Breiz-Veur en tu all d'ar mour  
Ez eo ganet sant Eneour,  
Kelennet gant e vamm Elen  
E skoueriou mat eun ti kristen.
- II. Evelse 'tle pep nann vreizat  
Rei d'he bugale ar skouer vat,  
A-vihanik deski d'ezo  
Karet 'n Aotrou Doue ato.
- III. Sevel 'reas 'n e yaouankiz  
Eur skol vrudet d'e genvroiz,  
Evit rei d'an holl vugale  
Deskadurez lezenn Doue.
- IV. Henchet goude gant dorn Doue,  
E teuas da jom e Kerne;  
Eur barrez vras en deus savet:  
PLOONEOUR eo breman hanvet.
- V. Goude ive meur a vloavez  
Tremenet e Plouneour-Trez,  
Da Blouneour-Menez 'z eas,  
Hag el lec'h-se hor sant 'varvas.
- VI. Sant Eneour karantezus,  
Ah! taolit eur sell truezus  
War ho pugale dastumet  
Evit ho meuli, tad karet.
- VII. Ni zo dinerz, Satan zo kre,  
Brezel a ra ouzomp benede;  
O tad santel, ouz an tech fall  
Ni ho ped ato d'hon diwall.
- VIII. Grit, ni ho ped, ma tiwano  
En hor parrez ha tro-war-dro  
An ed melén en douarou,  
Ar santelez er c'halonou.

